

四
五
妻
病
言
解

步青先生爲一瓢老人高足余束髮受書卽邀英盼時
年八秩長身玉立望之若神仙中人繼與文孫春泉交
知篋衍所藏手澤猶新未及請而伏誦也今歲夏初時
疫濡染危者日劇倉猝莫救心甚憫焉春泉手出是編
乞敘於余將付梓以共同好其用心亦仁矣哉竊聞江
南疫癘莫甚於崇禎之辛巳當時吳氏立論主以達原
飲同時西昌喻氏則主以人參敗毒散識者謂遵吳則
邪解正傷宗喻則留邪遺患也乾隆丙子江南治法多
遵吳氏而變通之往往應手取效今閱是編而有徵蓋
先生身丁其會臨證旣多又習諸先輩之緒論剖析入

微方多傳於古人用獨抒其心得卷帙無多較周氏溫
熱暑疫一書尤爲精當洵足津逮後學學者果能遵其
法明其意而不徒襲其方旣免多歧之亡羊亦弗守株
而待兔所關豈淺鮮哉因綴數語於簡端志其緣起以
告世之讀是書者

嘉慶乙亥夏五月澹安徐錦書於心太平軒

疫證每起兵荒之後周禹載吳又可代有成書然而有志之士知其疎節者未知其精旨得其正治者不得其變通我曾祖見疫病之殺人至亟也因參酌周吳二家之說並旁集諸書窮原竟委作爲是編刊板行世奈曩時刷印無多兵火後亦半作燼餘矣今從書肆索得舊本重加考訂以推廣而行之昌黎有云莫爲之前雖美弗彰莫爲之後雖聖弗傳此編彙先賢之格言摭畢生之心得亦猶是述而不作之用意焉爾曾孫炳揚謹識

溫毒病論

吳門邵登瀛步青輯

曾孫炳揚杏泉述

元孫

景康
景堯謹校

愚按冬溫春溫溫疫濕溫四症盛行之時每夾襍溫毒一症者有諸嘉言謂是病久熱熾成毒爲病中之病然攷金匱則曰七日不可治三十年來親歷是病其斃多在六七日之間其病一起卽劇多在三四日之內可知嘉言病久成毒之說爲非是而仲景所云七日不可治爲的確也嘗細繹之風寒暑濕熱皆天地之常氣人感之入手足經可以汗吐下溫清補常法治之苟治法頭



頭是道無不應手取效若溫毒感天地之厲氣無歲不
有但有輕重耳感入手經則病在上如頭面頤頤腫如
匏瓜喉痺失音頸項粗大爛喉丹疹之類感入足經則
病在中胃中有濁營衛不通血凝不流發斑紫黑陽毒
癰膿陰毒面青身如破杖之類若下入於陰則下血如
豚肝清便下重臍築湫痛之類感天地之常氣者病有
傳變治有候數可以常理測之常法治之若感天地之
厲氣者一發暴不可禦寒之散之攻之毫無一效醫者
茫不知作何病治束手待斃熱毒閃爍七日內已消滅
人之氣津血液不可治矣然則治之奈何曰治溫毒以

逐解爲功不可以清熱爲能嘉言云上焦如霧升逐解
毒中焦如漚疏逐解毒下焦如瀆挾逐解毒吳又可云
白虎無破結之能黃連有閉塞之害但求清熱猶揚湯
止沸且徒伐胃氣反抑邪毒脉變細小不治惟承氣有
奪邪之能當乘人氣血未亂津液未枯病人未至危殆
投劑不致掣肘旨哉二先生之論合而觀之溫毒之治
思過半矣今人遇溫毒病但知揚湯止沸迨至服寒涼
而愈熱茫無頭緒遷延待斃嗟乎其亦知寒涼無破結
之能反抑邪毒之理乎且亦知治溫毒當於七日前下
手乘人氣血未至消亡驅逐解毒乘勢追拔之理乎

述古

金匱云陽毒之爲病面赤斑斑如錦紋咽喉痛唾膿血五日可治七日不可治陰毒之爲病面目清身痛如被杖咽喉痛五日可治七日不可治

趙以德云斑皆熱毒傷於陰陽二經血分所以不分表裏俱以升麻解時氣毒厲療發斑開咽喉毒攻與熱毒成膿之症熱毒在陽經絡則面赤如錦斑唾膿血在陰經絡則面青身如被杖其曰五日可治七日不可治者五日乃土之生數熱未極也七日爲火之成數熱已極矣陰陽之氣津血液皆消滅矣傷寒七日經氣已盡而

此加之以毒至七日不惟消滅其陰且火極亦自滅矣
王安道云仲景所云陰毒非陰寒之病乃感天地惡毒
之氣入於陰經

王叔和云陽脉洪數陰脉實大更感溫濕變爲溫毒周
禹載云春至病溫之人更遇時熱爲未至而至之異氣
變爲溫毒

此論伏溫與時熱交并表裏俱熱溫毒爲病最重也其
脉浮沉俱盛其症心煩悶嘔逆喘咳甚則面赤身體俱
赤色狂亂躁渴咽腫痛狂言下利而發斑最爲危候
溫毒發斑因熱毒內攻不得散蘊於胃府而發出肌表

或失於汗下或汗下不解足冷耳聾胸中煩悶咳嗽嘔逆躁熱起臥不安者便是發斑之候

溫毒發斑並非因失汗下及汗下不解

斑如錦紋身熱煩躁大便燥結者黃連解毒湯

躁悶狂妄而無汗者三黃石膏湯

自汗煩渴而發斑爲胃熱人參化斑湯

煩熱錯語不得眠白虎合黃連解毒湯

斑不透犀角大青湯已透熱不退本湯去升麻黃芩加人參生地柴胡

斑色紫者爲危候黃連解毒合犀角地黃湯然須與病

家言過方用此症十中救二三若黑色而下陷者必死也

發斑雖禁下若大便秘躁渴色紫者可微下之

發斑已盡外熱已退內實不大便讞語小劑涼膈或大柴胡微下之

發斑紅赤者爲胃熱紫爲胃傷黑爲胃爛也大抵鮮紅起發者吉雖大不妨稠密成片紫色者半死半生襍色青紫者十死不一生矣

凡斑旣出須得脉洪數有力身溫足暖者易治若脉小足冷元氣虛弱者難治狂言發斑大便自利或短氣燥



結不通而黑斑如果實厲者不治

吳又可云熱留血分裏氣壅閉則邪毒不得外透而爲斑若下之內壅一通則衛氣亦從而疏暢或出表爲斑則邪毒亦從而外解矣若下後斑漸出不可更大下設有下症少與承氣緩緩下之

愚按發斑不可下指傷寒時氣而言內實色紫者可微下正指溫毒而言何也時行發熱內鬱及傷寒失汗失下汗下後不解煩躁嘔悶但得出表爲斑則嘔逆止煩悶解熱邪卽從之外泄非如溫毒斑雖見於肌表熱毒甚而內結煩躁愈加嘔悶仍然唇乾齒燥讞語昏昧不

大便鼻煤僅以犀地膏連之類解之揚湯止沸其如竈底加薪何惟大黃走而不守從營衛所出之源剷去邪毒之根使裏氣一通表氣亦順則火毒消散炎燭頓爲清涼爾昔滑伯仁治一人身大熱脉沉實而滑四末微清遍體赤斑舌黑芒刺神昏譫語以小柴胡加石膏知母連進三服次用大承氣湯下之而愈呂滄洲治一人神昏脉伏肌膚灼熱營熱發斑先與人參白虎湯化其斑次以桃仁承氣湯下之而愈由此觀之以上諸條所論清解斑毒之法仍不脫治傷寒時氣之窠臼以之治溫毒則否否惟用下三條爲有合於溫毒之治法也

發斑禁下可下辨

沈目南曰經言少陰所至爲瘍疹身熱故疹屬少陰君
火隱於皮膚之內少陽所至爲噎嘔瘡瘍故斑屬少陽
相火發於皮膚之上二者在春分以後暑令以前君相
司令感冒時熱風火內鬱發斑其症頭疼身熱足冷嘔
逆喘咳而胸煩滿悶躁熱起臥不安耳鳴耳聾渾渾焮
焮昏昧鼻乾呻吟勢甚者發熱一二日卽出六七日乃
退勢緩者四五日方出一二日卽退亦有隨出隨退有
稀疎幾點者有稠密如麤者然多細如蚊咬色亦鮮紅
或間有紫色細點此手經爲病故無下法

少陰疹治法總以透達爲主若少陽斑屬三焦相火其
症與傷寒陽明發斑不同與時令少陰發斑神昏舌絳
者亦異不過風熱內鬱而已治宜涼膈去硝黃加防風
荆芥川芎赤芍桔梗或柴芎香豉飲

傷寒發斑因失汗則表邪不解失下則裏邪不解下早
則邪陷不解下遲則火盛不解或陽症誤陰則熱甚傷
血裏實表虛熱邪乘虛蘊於肌腠而爲斑也輕者色紅
而赤重者紫色而顯輕者細如蚊迹只在四肢重者成
粒成叢乃見胸腹治宜透之解之毒氣外宣火威下抑
中州之禍解免如元氣虛者當扶元氣而兼化斑若下

之則熱毒內陷症反變劇故禁下法溫毒發斑不因失汗失下一起脉浮沉俱盛壯熱煩躁起卧不安外或頭面洪腫咽喉腫痛吐膿血面赤如錦紋身痛如被杖內則煩悶嘔逆腹痛狂亂躁渴或狂言下利如是而發斑者點如豆大而圓色必紫黑而顯胸背腰腹俱稠毒氣瀰漫營衛三焦壅閉燔灼氣血斯時而任白虎之化斑犀角大青之解毒邪毒得降而愈鬱反致不救惟下之內壅一通邪氣因有出路斑毒亦從而外解矣治法當與疫病發斑參看

附溫毒可下症

舌黃胎 黑胎芒刺

得病二三日舌乾焦黃大渴煩躁熱已瘀胃也調胃承氣湯若表裏俱實熱者涼膈散

黑胎芒刺邪毒在胃薰騰於上也或硬黑或軟黑大承氣湯下之黑皮自脫

唇燥裂 唇焦 鼻如烟煤

胃熱多有此症若鼻煤尤熱毒在胃下之無疑

目赤 氣噴如火 狂煩揚手擲足 小便赤黑涓滴

作痛皆熱極下之無疑

心下脹滿 高起如塊 心下拒按